

第一百零三冊

卷一百九十三

列傳五

卷一百九十四

列傳六

新纂雲南通志

盧漢題

簽



新纂雲南通志卷一百九十三目錄

列傳五 明

傅宗龍楊繩武

胡平表

趙譔

王錫袞

徐朝綱楊以成段高選 選子暉

周二南邱存忠

何天衢

耿廷錄馬乾

那嵩 附皮熊熊壻趙默

胡一青遲光啓孔師程

龔彝席上珍薛大觀

林啓俊申甫張先璧張化樞

龍在田

李兆旂李爲棟 兆旂子演澄淳

新纂雲南通志卷一百九十四目錄

列傳六

明

文祖堯

陶珽雷躍龍

趙炳龍高應雷

陳佐才

武恬康誥

郝太極

孫興可童繆甲

釋普荷讀徹

新纂雲南通志卷一百九十三

列傳五

明

傅宗龍楊繩武傳

傅宗龍字仲倫昆明人萬曆三十八年進士除銅梁知縣調巴縣行
取入爲戶部主事久之授御史天啟元年遼陽破帝下募兵令宗龍
得精卒五千請行明年安邦彥反圍貴陽土寇蠡起宗龍請開建昌
通由蜀入滇之路別設偏沅巡撫罷湖廣退怯總兵薛來允又上疏
自請討賊且曰爲武定尋甸患者東川土酋祿千鍾爲霑益羅平患
者賊婦設科及其黨李賢輩攻圍普安爲滇黔門戶患者龍文治妻
及其黨尹二困安南據關索嶺者沙國珍及羅應魁輩困烏撒者安
效良臣皆悉其生平非臣敵臣願以四川巡按兼監軍滅此羣醜帝

大喜下所司議會宗龍以疾歸不果行四年正月貴州巡撫王三善爲降賊陳其愚所紿敗歿其夏即家起宗龍巡按兼監軍初部檄滇撫閔洪學援黔以不能過盤江而止宗龍旣被命洪學命參政謝存仁參將袁善及土官普名聲沙如玉等以兵五千送之宗龍直渡盤江戰且行寇悉破乃遣謝存仁等以普名聲等土兵七百人入貴陽擒斬其愚宗龍盡知黔中要害及土酋逆順將士勇怯巡撫蔡復一請敕宗龍專理軍務設中軍旗鼓裨將以下聽賞罰宗龍乃條上方略又備陳黔中艱苦請大發餉金報可三善初令監軍道臣節制諸將文武不和進退牽制宗龍反其所爲令監軍給芻糧覈功罪不得專進止由是諸將用命連破賊汪家冲蔣義寨直抵織金五年正月總理魯欽敗績於陸廣河宗龍上言不合滇蜀則黔不能平不專總

督任則不能合滇蜀兵請召還朱燮元以復一兼督四川開府遵義而移蜀撫駐永寧滇撫駐霑益黔撫駐陸廣沅撫駐偏橋四面並進發餉二百萬金給之更設黔蜀巡撫帝以復一新敗令解官即以燮元代而命尹同臯撫蜀王璠撫黔沅撫閔夢得移鎮一如宗龍議陸廣敗後諸苗復蠢動復一宗龍謀討破烏栗螺螳長田諸叛苗大破平越賊毀其砦百七十賊黨漸孤宗龍乃條上屯守策言蜀以屯爲守黔則當以守爲屯蓋安酋土地半在水外仡佬龍仲蔡苗諸雜種緩急與相助賊有外藩我無邊蔽黔兵所以分力愈詘臣請以守爲屯者先發兵據河奪賊所恃然後撫勦諸種隨渡口大小置大小寨深溝高壘置烽燧礮臺小渡則塞以木石使一粟不入水內一賊不出水外賊無如我何又令沿河兵習水戰當賊耕耨時頻出其兵渡

河擾之賊不敢附河而居而後我可議屯也屯之策有二一曰清衛所原田一曰割逆賊故壤而以衛所之法行之蓋不患無田患無人客兵聚散無常不能久駐莫若倣祖制盡舉屯田以授有功因功大小爲官高下自指揮至總小旗畀以應得田爲世業而禁其私賣買不待招徠戶口自實臣所謂以守爲屯者如此然兵當用四萬八千人餉當歲八十餘萬時當閱三年如此而後賊可盡滅也部議從之宗龍乃漸翦水外逆黨將大興屯田邦彥懼謀沮之六年三月大舉渡河入寇宗龍擊破邦彥趙官屯斬老蟲添威名大著詔加太僕少卿憂歸崇禎三年用孫承宗薦擢右僉都御史巡撫順天未幾拜兵部右侍郎兼僉都御史總督薊遼保定軍務因事奪官居十年流寇大入蜀陷蜀三十餘州縣帝即家起宗龍平賊十二年以楊嗣昌薦

召爲兵部尙書宗龍自定黔亂後凡十有四年輒起用用不久輒遷去宗龍爲人伉直任氣不能從諛帝憤中樞失職嗣昌以權詭得主知宗龍樸忠初入見即言民窮財盡帝然之顧狼狽言不已帝怫然曰卿當整理兵事耳既退語嗣昌曰何哉宗龍善策黔而所言卑卑皆他人唾餘自是所奏請多中格熊文燦既罷宗龍乃言向者賊流突東西嗣昌故建分勦之策今則流突者各止其所臣請收勢險節短之效總理止轄楚豫秦督兼轄四川鳳督兼轄安慶各率所轄撫鎮期十二月成功因薦湖廣巡撫方孔炤堪代文燦帝不用用嗣昌督師嗣昌上章請兵食不悉應劾中樞不任職宗龍亦劾嗣昌徒耗敝國家不能收效以氣凌廷臣帝以他故下宗龍吏繫二年嗣昌死尙書陳新甲薦其才出獄以兵部右侍郎兼右僉都御史代丁啟睿

總督陝西三邊軍務當是時李自成有衆五十萬自陷河洛犯開封
羅汝才復自南陽趨鄧浙與合兵帝命宗龍專辦自成議盡括關中
餉以出然屬郡旱蝗已不能應九月四日以川陝兵二萬出關次新
蔡與保督楊文岳兵會賀人龍李國奇將秦兵虎大威將保兵共結
浮橋東渡汝合兵趨項城五日兩軍畢渡走龍口自成汝才亦結浮
橋於上流將趨汝寧覘兩督兵至盡伏精銳於林中陽驅諸賊自浮
橋西渡人龍使後騎覘賊還報曰賊向汝矣結浮橋將渡矣宗龍文
岳夜會諸將於龍口詰朝將戰六日兩軍並進中道一騎馳告曰賊
畢渡矣復進一騎馳而告曰賊半渡矣三分渡其二矣宗龍文岳曰
驅之走三十里至於孟家莊日午人龍大威曰馬力乏矣詰朝而戰
止兵爲營諸軍弛馬甲植戈鋌散行墟落求芻牧賊覘之塵起於林

中伏甲並出搏我兵人龍有馬千騎不戰國奇以麾下兵迎擊之不勝秦兵保兵俱潰人龍大威奔沈邱國奇從之三帥師潰宗龍文岳合兵屯火燒店賊以步兵攻其營諸軍鳴大礮死賊百餘日暮賊引去宗龍軍西北文岳軍東南畫塹而守保兵宵潰保督副將挾文岳騎而馳夜奔項城宗龍復分秦兵立營東南諸將分壁當賊壘九日檄人龍國奇還兵救二帥不應宗龍曰彼避死宜不來吾豈避死哉語其麾下曰宗龍老矣今日陷賊中當與諸軍決一死戰不能效他人捲甲走也即文岳壁穿塹築壘以禦賊賊亦穿濠二重以圍之十一日秦師食盡宗龍殺馬牛以享軍明日營中馬騾盡殺賊取其屍分噉之十八日營中火藥鉛子矢並盡宗龍簡士卒夷傷死喪之餘有衆六千夜半潛勒諸軍突賊營殺千餘人潰圍出諸軍星散宗龍

徒步率諸軍戰且走十九日日卓午未至項城八里賊追及之執宗龍賺城人啓門宗龍大呼曰我秦督也不幸墮賊手左右皆賊耳賊唾宗龍宗龍罵賊曰我大臣也殺則殺耳豈能爲賊賺城以緩死哉賊抽刀擊宗龍中其腦而仆折其耳鼻死城下事聞帝曰若此可謂樸忠矣復官兵部尙書加太子少保諡忠壯

明史
趙元祚撰傳

楊繩武字念爾彌勒人兼資文武容貌過人登崇禎辛未進士選庶常授監察御史巡鹽河東浚鹽池完逋課歲饑設粥濟民全活甚衆會妖賊以白蓮教聚衆繩武設方略獲首惡解散其黨巡按河南土賊郭三海糾衆至數萬繩武率兵擒之流寇不敢犯境因入都條呈數事召對平臺稱旨擢僉都御史巡撫順天駐遵化時流寇猖獗懷宗以勦賊任之晉兵部侍郎總督薊遼軍務賜上方劍繩武治兵有

法汎地無虞方旋京復命而關門告警廷催赴援再令督師時病劇力疾至豐潤卒於軍上聞震悼贈光祿大夫太子少傅兵部尚書予祭葬廕一子世襲錦衣千戶

明史 滇繫

贊曰傳宗龍武節剛方志利君國經略南蠻邊烽以靖比之漢世蓋辛趙之倫及夫巨寇滔天杖節誓衆神州遘倒懸之急黎庶有渙畔之心猶且提挈殘痍決首陷陣何其烈也楊繩武之才略並於宗龍出師未捷疾捐原野惜哉古所謂人之云亡邦國殄瘁者其二子之謂乎

胡平表傳

胡平表阿迷人萬曆丙午舉人歷忠州判官天啓元年秋樊龍陷重慶平表縋城下詣石砮土官秦良玉乞師號泣不食飲者五晝夜良

玉爲發兵巡撫朱燮元檄平表監良玉軍會擢新鄭知縣燮元奏留
之改重慶推官監軍兼副總兵盡護諸軍將戰數有功擢四川監軍
僉事兼理屯田遷貴州右參議崇禎元年總督張鶴鳴言平表偏州
小吏慷慨赴義復新都解成都圍連戰百市驛馬廟進據兩嶺俘斬
無算奪二郎關擒賊帥黑蓬頭追降樊龍遂克重慶用六千人敗奢
安二酋十萬兵請以本官加督師御史銜賜之專勅必能梟逆賊首
獻闕下部議格不行乃進秩右參政分守貴寧道廕子錦衣世襲千
戶久之擢貴州布政使四年大計坐不謹落職十三年督師楊嗣昌
薦之詔以武昌通判監標下軍事嗣昌卒乃罷歸

明史朱燮元附傳
道光志臨安府志

贊曰胡平表詣石砮土官乞師有申包胥哭秦廷遺風而重慶一役
以六千人敗奢安二酋十萬兵非智勇兼優者不足以語此惜乎在

上者不知人格於成例而大才未盡其用也

趙譔傳

趙譔字鎮所昆明人天啓丁卯舉人性端方有勇力任貴州龍泉知縣有白蓮教倡亂盜賊蠡起苗蠻乘間作亂譔率勇士勦平之撫順苗蠻又於上元夜設劇張燈誘賊入城密調勇士執銅錘擊殺之以卓異擢御史崇禎甲申闖賊陷京師譔巡中城城既破譔率象戰白帽衝衝力盡賊獲譔譔瞑目大罵賊怒殺之長子從德隨殉難其僕某負屍葬於愍忠寺西寺爲宋謝疊山殉節之地滇人於其冢前建祠曰景忠石屏張漢爲之記乾隆四年以貴州道監察御史傳爲訄奏請賜諡忠愍

康熙志 趙忠愍公景忠集

贊曰主辱臣死天之經地之義也然而臨難不苟視死如歸者蓋自

古難之惟其難能是以可貴譔之死烈矣顧非張傳爲之表章安能傳斯人於不朽今讀景忠集凜凜有生氣矣

王錫衮傳

王錫衮字昆華祿豐人王氏世爲華陰人有仲寬者以良家子從潁川侯克演授右衛冠帶總旗幾傳而至勤士聰潁天植過目成誦外和而內介尤以孝行稱著有易學眞傳養儉手鈔等書行世是生錫衮錫衮成天啟二年進士改庶吉士授檢討崇禎元年官至少詹事二年冬十一月清兵入塞陷遵化帝信敵反間下督帥袁崇煥獄錫衮抗疏爲崇煥白冤七年七月清兵復入塞京師震動廷命大小臣工言事錫衮疏言歷年邊事之失策胥由任將之不得其人得其人而任用不專之故力請以盧象昇專任邊事十三年擢禮部右侍郎

明年秋尙書林欲楫出視孝陵錫袞以左侍郎掌部事帝禁內臣干預外政敕禮臣稽先朝典制以聞錫袞等備列諸監局職掌而不及東廠提督內臣王德化言東廠之設始永樂十八年國朝典彙可據禮官覆議不及請解臣職停廠不設錫袞等言典彙雖載此條但係下文箋註臣等以正史無文故不敢妄引帝不聽錫袞復抗疏請罷廠亦不允二月帝耕藉田錫袞因言頻歲旱蝗三餉疊派請量除加徵嚴核蠹餉俾農夫樂生又以時方急才請召還故侍郎陳子壯顧錫疇故祭酒倪元璐文安之且乞免黃道周永戍欲楫還朝錫袞調吏部尙書李日宣下獄遂掌部事尋解部務直講筵十六年憂歸唐王立拜禮部尙書兼東閣大學士永明王立申前命皆不至沙定洲之亂滇也錫袞爲所囚錫袞初受唐王督師命調滇黔兵入衛出家

財召募義勇行有日矣定洲之亂作黔國公出奔錫袞亦西走爲追兵所執定洲館之貢院禮待之欲與共滅沐氏錫袞怒罵不從定洲以其人望也不敢殺羈留之永明王留粵中有輔政之命不得達及孫可望兵至滇定洲敗將歸山峒遣將杜其飛劫錫袞同行錫袞復罵曰我國之大臣豈從賊往耶遂遇害先一日其同年偵賊將棄城遣人語錫袞曰賊將行恐不利於公幸潛避之錫袞曰去一狼進一

虎沙與闖均死也何避爲

明史 滇南
五名臣遺集

贊曰王錫袞剛毅有守正色立朝摧抑權閹而遭逢國變喪亂方弘雖懷獻替之誠終鮮迴天之力及乎大命旣傾橫遭係累義重於生誓不屈辱亦一世之忠烈士也美哉

徐朝綱楊以成段高選傳

選子垣